



**Republika e Kosovës**  
**Republika Kosovo - Republic of Kosovo**  
*Kuvendi - Skupština - Assembly*

---

**Ligji Nr. 04/L-084**

**PËR PENSIONET E PJESËTARËVE TË FORCËS SË SIGURISË SË  
KOSOVËS**

**Kuvendi i Republikës së Kosovës;**

Në bazë të nenit 65 (1) të Kushtetutës së Republikës së Kosovës,

Miratton

**LIGJ PËR PENSIONET E PJESËTARËVE TË FORCËS SË SIGURISË  
SË KOSOVËS**

**Neni 1**  
**Qëllimi**

Ky ligj përcakton të drejtën në pension për pjesëtarin e Forcës së Sigurisë së Kosovës dhe familjarët e tij.

**Neni 2**  
**Fusha e zbatimit**

Ky ligj rregullon dhe përcakton kushtet, kriteret për garantimin e pensioneve dhe llojet e pensioneve për pjesëtarin e Forcës së Sigurisë së Kosovës dhe familjarët e tij.

### **Neni 3 Përkufizimet**

1. Shprehjet e përdorura në këtë ligj kanë këtë kuptim:

- 1.1. **Departamenti i Administratës Pensionale (DAP)** - Njësia administrative në kuadër të Ministrisë së Punës dhe Mirëqenies Sociale;
- 1.2. **Familjarët** - Siç parashihet në nenin 12 të këtij ligji;
- 1.3. **FSK** - Forca e Sigurisë së Kosovës;
- 1.4. **Koha e shërbimit** - E gjithë periudha kohore e shërbimit, si pjesëtar i FSK-së. Koha e shërbimit llogaritet me ditë, muaj dhe vite dhe nuk përfshinë pushimet e pa autorizuara;
- 1.5. **MFSK** - Ministria përkatëse për Forcën e Sigurisë së Kosovës;
- 1.6. **MPMS** - Ministria përkatëse e Punës dhe Mirëqenies Sociale;
- 1.7. **Pension** - Pagesa e rregullt mujore të financuar nga buxheti i Republikës së Kosovës për pensionistin që i plotëson kushtet e parapara këtë ligj;
- 1.8. **Pensioni Familjar** - Pensioni i rregullt mujor për familjarët në rast të vdekjes së pjesëtarit/pensionistit të FSK-së, të cilët i plotësojnë kriteret e parapara me këtë ligj;
- 1.9. **Pensioni i FSK-së** - Pensioni i pjesëtarit të FSK-së;
- 1.10. **Pensioni i pjesëtarit aktiv të FSK-së** - Pagesa e rregullt mujore që paguhet nga buxheti i Kosovës për pjesëtarin aktiv të FSK-së, i cili i plotëson kriteret e parapara me këtë ligj për pensionim;
- 1.11. **Pensioni i pjesëtarit Rezervë të FSK-së** - Pagesa e rregullt mujore që paguhet nga buxheti i Kosovës për pjesëtarin rezervë të FSK-së, i cili i plotëson kriteret e parapara me këtë ligj për pensionim;
- 1.12. **Pensionisti i FSK-së** - Personi, të cilit i takon e drejta në pension të FSK-së;
- 1.13. **Pjesëtar Aktiv i FSK-së** - Pjesëtar i cili shërben me orar të plotë në FSK-ë;
- 1.14. **Pjesëtar i FSK-së** - Pjesëtar i aktiv (përfshirë rekrutët dhe kadetët) dhe pjesëtar i rezervë i FSK-së;
- 1.15. **Pjesëtar i rezervë i FSK-së** - Sipas Ligjit të Komponentit Rezervë;

1.16. **Rezerva e FSK-së** - Komponenti Rezervë i FSK-së;

1.17. **TMK** - Trupat e Mbrojtjes së Kosovës.

#### **Neni 4 Llojet e pensioneve**

1. Ky ligj rregullon këto lloje të pensioneve:

1.1. Pensionin e rregullt;

1.2. Pensionin invalidor;

1.3. Pensionin familjar.

#### **Neni 5 Përfituesit**

1. Përfituesit e pensioneve të përcaktuar me këtë ligj janë:

1.1. pjesëtari aktiv i FSK-së, i cili përmbush kriteret e parapara në nenin 6 të këtij ligji;

1.2. pjesëtari i Rezervës së FSK-së, i cili përmbush kriteret e parapara në nenin 9 të këtij ligji;

1.3. familjarët, të cilët i përmbushin kriteret e parapara në nenet 13, 16 dhe 19 të këtij ligji.

2. Përfituesit kanë të drejtë në pensionin e FSK-së, pavarësisht nga një punësim tjetër në sektorin publik apo privat, përveç nëse ata shërbejnë sërish në FSK.

3. Përfituesit që kanë të drejtë në pensionin e FSK-së, të paraparë me këtë ligj, duhet të zgjedhin njërin nga përfitimet: pensionin që iu takon me këtë ligj, apo përfitimet tjera që parashihen me ligjet tjera në fuqi.

#### **Neni 6 Pensioni për pjesëtarin aktiv të FSK-së**

1. Pjesëtari aktiv i FSK-së fiton të drejtën në pension të rregullt, nëse koha e tij e shërbimit, si pjesëtar aktiv i FSK-së, është së paku njëzet (20) vite dhe ka mbushur moshën pesëdhjetë (50) vjeçare si nënoficer dhe pesëdhjetë e pesë (55) vjeçare si oficer.

2. Pjesëtari aktiv i FSK-së fiton të drejtën në pension invalidor, nëse, të njëjtit, i ndërpritet shërbimi për shkak të lëndimeve ose sëmundjeve profesionale. Shkalla e invaliditetit përcaktohet nga Komisioni mjekësor që vepron në kuadër të MPMS-së, sipas rekomandimeve të Bordit mjekësor të FSK-së.

3. Kriteret dhe procedurat për përcaktimin e shkallës së invaliditetit përcaktohen me akt nënligjor, të cilin e nxjerrë MFSK dhe MPMS.

## **Neni 7**

### **Lartësia e pensioneve të pjesëtarit aktiv të FSK-së**

1. Lartësia e pensionit të rregullt të pjesëtarit aktiv të FSK-së llogaritet në bazë të përqindjes së pagës bruto të pjesëtarit dhe kohës së shërbimit. Paga bazohet në gradën e pjesëtarit të FSK-së, në momentin e pensionimit.

2. Baza e pensionit të rregullt të pjesëtarit aktiv të FSK-së është dyzet përqind (40%) e pagës bruto së pjesëtarit të FSK-së në momentin e pensionimit. Për çdo vit shërbimi si pjesëtarë aktiv i FSK, koeficienti i përqindjes rritet për dy përqind (2%), por nuk mund të kaloj gjashtëdhjetë përqind (60%) e pagës bruto.

3. Lartësia e pensionit invalidor të pjesëtarit të FSK-së llogaritet varësisht nga shkalla e paaftësisë së përhershme për punë të fituar në shërbim. Pjesëtari aktiv realizon pensionin invalidor nga njëzet deri njëqind përqind (20-100%) të pagës bruto, në momentin e invaliditetit. Për çdo vit të shërbimit, si pjesëtar aktiv i FSK-së, pagesa financiare rritet për dy përqind (2%) në koeficientin e përqindjes, por nuk mund ta kaloj njëqind përqind (100%) të pagës bruto.

## **Neni 8**

### **Humbja e së drejtës në pensionin e pjesëtarit aktiv të FSK-së**

1. Shfrytëzuesi e humb të drejtën e pensionit të pjesëtarit aktiv të FSK-së:

1.1. në rast të vdekjes;

1.2. nëse vlerësohet se parashtruesi i kërkesës ka bërë mashtrim gjatë procesit të aplikimit;

1.3. nëse gjatë monitorimit dhe inspektimit nga zyrtarët përgjegjës të DAP-it, konstatohen prova materiale të rrejshme nga ana e pensionistit.

## **Neni 9**

### **Pensioni për pjesëtarin rezervë të FSK-së**

1. Pjesëtar i rezervë i FSK-së fiton të drejtën në pension të rregullt të FSK-së, nëse koha e tij e shërbimit, si pjesëtar rezervë i FSK-së, është së paku njëzetë (20) vite dhe ka mbushur moshën gjashtëdhjetë e pesë (65) vjeçare. Ky pension i takon pjesëtarit rezervë të FSK-së, si shtesë e pensionit bazik.
2. Pjesëtar i rezervë i FSK-së fiton të drejtën në pension invalidor, nëse, të njëjtit, i ndërpritet shërbimi për shkak të lëndimeve ose sëmundjeve profesionale. Shkalla e invaliditetit përcaktohet nga Komisioni mjekësor që vepron në kuadër të MPMS, sipas rekomandimeve të Bordit mjekësor të FSK-së.

## **Neni 10**

### **Lartësia e pensionit të pjesëtarëve rezervë të FSK-së**

1. Lartësia e pensionit të rregullt të pjesëtarit rezervë të FSK-së, llogaritet në bazë të përqindjes së pagës bruto të pjesëtarit dhe kohës së shërbimit.
2. Përqindja e pensionit llogaritet nga zero pikë pesë përqind (0.5%) për çdo vit të shërbimit në FSK, bazuar në gradën që bart pjesëtar i në momentin e pensionimit.
3. Lartësia e pensionit invalidor të pjesëtarit rezervë të FSK-së llogaritet varësisht nga shkalla e paaftësisë për punë. Pjesëtar i rezervë realizon pensionin invalidor nga njëze deri njëqind përqind (20-100%) të pagës bruto. Për çdo vit të shërbimit si pjesëtar rezervë i FSK-së, pagesa financiare rritet për zero pikë pesë përqind (0.5%), por nuk mund ta kalojë njëqind përqind (100%) të pagës bruto.

## **Neni 11**

### **Humbja e së drejtës në pensionin e pjesëtarit rezervë të FSK-së**

Shfrytëzuesi e humb të drejtën në pensionin e pjesëtarit rezervë të FSK-së, sipas kushteve të parapara me nenin 8 të këtij ligji.

## **Neni 12**

### **E drejta në pension familjar**

1. E drejta në pensionin familjar u takon:
  - 1.1. bashkëshort/it-ës;
  - 1.2. fëmijëve trashëgimtarë, duke përfshirë fëmijët martesor, jashtëmartesor dhe të adoptuar;

1.3. prindërve.

### **Neni 13**

#### **E drejta bashkëshortit/ës në pension familjar**

Personi, i cili është në martesë me pjesëtarin/pensionistin e FSK-së në kohën e vdekjes së tij, ka të drejtë të marrë pensionin e bashkëshort/it-ës, pavarësisht moshës

### **Neni 14**

#### **Lartësia e pensionit të bashkëshort/it-ës në pension familjar**

Lartësia e pensionit të bashkëshort/it-ës është gjashtëdhjetë (60) për qind e pensionit që i është paguar pjesëtarit/pensionistit që ka vdekur.

### **Neni 15**

#### **Humbja e së drejtës së bashkëshortit/it-ës në pensionin familjar**

1. Shfrytëzuesi e humb të drejtën e tij/saj në pensionin familjar:

- 1.1. në rast të vdekjes;
- 1.2. në rast të martesës së re;
- 1.3. me vendimin e gjykatës për humbjen e kujdesit të fëmijëve trashëgimtarë.

### **Neni 16**

#### **E drejta e fëmijëve trashëgimtarë në pension familjar**

1. Fëmijët trashëgimtarë të pjesëtarit/pensionistit të FSK-së, të cilët janë nën moshën tetëmbëdhjetë (18) vjeçare, përkatësisht moshën njëzet e gjashtë (26) vjeçare, nëse ofrojnë dëshmi për vijueshmërinë e shkollimit, kanë të drejtë në pensionin familjar pas vdekjes së pensionistit.

2. Fëmijët trashëgimtarë me aftësi të kufizuara, të pjesëtarit/pensionistit të FSK-së, kanë të drejtë në pension familjar pavarësisht nga mosha, nëse ata janë me aftësi të kufizuara në datën e vdekjes së pensionistit, në masën e njëjtë sikurse për fëmijët tjerë, për gjithë jetën.

**Neni 17**  
**Lartësia e pensionit familjar të fëmijëve**

1. Lartësia e pensionit familjar për secilin fëmijë është dhjetë përqind (10%), por nuk mund ta kalojë dyzet përqind (40%) të pensionit të pjesëtarit/pensionistit të vdekur. Nëse ka më shumë fëmijë ndahet në mënyrë të barabartë.
2. Nëse bashkëshorti/ja humb të drejtën në pension, ose nëse pjesëtari/pensionisti i FSK-së nuk ka bashkëshort/e, atëherë pensioni i fëmijëve trashëgimtarë rritet për gjashtëdhjetë përqind (60%) dhe ndahet në mënyrë të barabartë për të gjithë.

**Neni 18**  
**Humbja e drejtës së fëmijëve në pensionin familjar**

1. Fëmija trashëgimtar e humb të drejtën e tij/saj për pension familjar në rast të:
  - 1.1. vdekjes së shfrytëzuesit;
  - 1.2. me arritjen e moshës tetëmbëdhjetë (18) vjeçare apo me përfundimin ose ndërprerjen e shkollimit ose arritjen e moshës njëzet e gjashtë (26) vjeçare;
  - 1.3. shërimit nga paaftësia/invaliditeti.

**Neni 19**  
**E drejta e prindërve në pensionin familjar**

Në rastet kur pjesëtari/pensionisti i FSK-së nuk ka bashkëshort/e dhe fëmijë, pensioni familjar iu takon njërit prej prindërve të pensionistit, në lartësinë prej gjashtëdhjetë përqind (60%) të pensionit të pensionistit të vdekur të FSK-së.

**Neni 20**  
**Rregullat e veçanta të përfitimit të pensionit familjar**

Në rastet kur pjesëtari i FSK-së vdes në detyrë ose për shkak të detyrës, ashtu siç e përcakton Komisioni i veçantë i MFSK-së, familjarëve të tij/saj, të përcaktuar me këtë ligj, iu takon pension ashtu siç parashihet në nenin 13, 16, dhe 19, të këtij ligji duke llogaritur pensionin mbi bazën njëqind përqind (100%) të pagës së pjesëtarit.

## **Neni 21**

### **Realizimi i pensionit familjar**

Shfrytëzuesit e pensionit familjar, të paraparë me këtë ligj, duhet të zgjedhin njërin nga pensionet: atë, të cilin e trashëgojnë nga pensionisti i FSK-së, apo pensionet të tjera, që përcaktohen me skemat tjera pensionale.

## **Neni 22**

### **Rregullat e veçanta të pensionimit për ish pjesëtari e TMK-së, të cilët shërbejnë në FSK**

1. Pjesëtari aktiv i FSK-së, i cili ka shërbyer në TMK e fiton të drejtën në pension të rregullt të FSK-së:

1.1 pasi të ketë përmbushur shërbimin tre (3) vjeçar në FSK dhe me Vendim të Ministrisë të FSK-së të bazuar në kriteret e akteve të brendshme të shërbimit në FSK, si dhe në pajtim me mundësitë vjetore financiare të Buxhetit të Republikës së Kosovës ; ose

1.2. me arritjen e moshës pesëdhjetë (50) vjeçare si nënoficer dhe pesëdhjetë e pesë (55) vjeçare si oficer.

2. Nëse për çfarëdo arsye tejkalohej numri i parashikuar për pensionimin e pjesëtarëve të FSK, për secilin vit kalendarik, sipas Vlerësimit Financiar të paraparë nga MFSK, duhet të nxirret vendim i veçantë i Qeverisë së Republikës së Kosovës.

3. Shuma e pensionit të rregullt llogaritet mbi pagën bazë të pjesëtarit në momentin e pensionimit. Përqindja e pensionit të rregullt është dyzet përqind (40%) e pagës bazë bruto, dhe për çdo vit të shërbimit si pjesëtarë i FSK-së dhe TMK-së koeficienti i përqindjes rritet për dy përqind ( 2%) por nuk mund ta kalojë gjashtëdhjetë përqind (60%) e pagës bazë.

4. Pjesëtarët të cilët pensionohen sipas nën-paragrafit 1.1 të paragrafit 1. të këtij neni, do të marrin pensionin mbi bazën dyzet përqind (40%), ndërsa llogaritja e viteve të shërbimit për dy përqind (2%) do të bëhet pas arritjes së moshës pesëdhjetë (50) vjeçare për nënoficer dhe pesëdhjetë e pesë (55) vjeçare për oficer.

5. Pjesëtari i FSK-së, i cili ka shërbyer në TMK e fiton të drejtën në pension invalidor, nëse, të njëjtë, i ndërpritet shërbimi për shkak të lëndimeve ose sëmundjeve profesionale. Shkalla e invaliditetit përcaktohet nga Komisioni mjekësor që vepron në kuadër të MPMS-së, sipas rekomandimeve të Bordit mjekësor të FSK-së.

6. Lartësia e pensionit invalidor të pjesëtarit aktiv të FSK-së, i cili ka shërbyer në TMK, llogaritet varësisht nga shkalla e paaftësisë për punë. Pjesëtari realizon pensionin invalidor nga njëzet deri njëqind përqind (20-100 %), të pagës bruto, për çdo vit të shërbimit, si pjesëtar aktiv



i FSK-së, duke përfshirë edhe vitet e shërbimit në TMK, koeficienti i përqindjes rritet për dy përqind (2%), por nuk mund ta kalojë njëqind përqind (100%) të shumës totale.

**Neni 23**  
**Obligimet ligjore të shfrytëzuesve të pensioneve**

1. Të gjithë shfrytëzuesit e pensioneve të parapara me këtë ligj, janë të obliguar të njoftojnë me shkrim administratën pensionale të Kosovës për çdo ndryshim të rrethanave
2. Mos përmbushja e obligimeve nga paragrafi 1. i këtij neni sanksionohet sipas ligjit në fuqi.

**Neni 24**  
**Menaxhimi dhe Administrimi i Pensioneve**

DAP, si njësi e MPMS, menaxhon dhe administron pagesën e pensioneve të përcaktuara me këtë ligj.

**Neni 25**  
**Indeksimi i Pensioneve**

Pensionet që rregullohen me këtë ligj indeksohen sipas kushteve dhe kriterëve të cilat aplikohen për indeksimin e skemave tjera pensionale të financuara nga shteti.

**Neni 26**  
**Sigurimi i mjeteve financiare për pensione**

Mjetet financiare për pagesën e të gjitha pensioneve të përcaktuara me këtë ligj, do të sigurohen nga Buxheti i Republikës së Kosovës.

**Neni 27**  
**Garantimi i pensioneve**

Qeveria e Republikës së Kosovës do të garantojë realizmin e të drejtave për të gjitha llojet e pensioneve të përcaktuara me këtë ligj.

**Neni 28**  
**Procedurat Administrative**

Pensionet e përcaktuara me këtë ligj realizohen sipas procedurave të parapara për skemat tjera pensionale të financuara nga shteti, duke përfshirë edhe procedurat e ankimit, sipas ligjit në fuqi për procedurat administrative.

**Neni 29**  
**Pensionet e FSK-së para hyrjes në fuqi të këtij ligji**

Pjesëtari e FSK-së dhe familjarët e tyre kanë të drejtë në pensionet e parapara me këtë ligj, nëse këto të drejta janë fituar para hyrjes në fuqi të këtij ligji.

**Neni 30**  
**Aktet nënligjore**

Të gjitha aktet nënligjore, të parapara me këtë ligj, përgatiten dhe miratohen nga institucionet përkatëse, në afat prej gjashtë (6) muajve, prej ditës kur ky ligj hyn në fuqi.

**Neni 31**  
**Hyrja në Fuqi**

Ky ligj hyn në fuqi pesëmbëdhjetë (15) ditë pas publikimit në Gazetën zyrtare të Republikës së Kosovës.

**Ligji Nr. 04/ L-084**  
**15 mars 2012**

**Kryetari i Kuvendit të Republikës së Kosovës,**

\_\_\_\_\_  
**Jakup KRASNIQI**